


# TEZAUUR LITURGIC

21 MAI

# ACATISTUL SF. CUVIOS MOISE DE LA UFIMSK



MOSCOVA, 2000



# Акафист Моисею Уфимскому

## Кондак 1

Избранный от Бога и к лику преподобных  
сопричтенный, от юности крест свой взял,  
Христу последовал еси, в молитвах, пощении, во  
бдении и злострадании житие твое проводя; тем  
же Господь, возрев на твоя труды, чудесы твоя  
прославляет и воспевати научает:

Радуйся, преподобне отче Моисее, земли  
Уфимския похвало и молитвенниче о нас  
предивный.

## Икос 1

Ангелов Творец избра твоя изначала и всели в  
юное сердце твое любовь к молитве, чтению  
Слова Божия и святых жития, ими же поучаяся,  
укреплялся еси во благочестии, ни во что же  
вменяя суету мира сего. Мы же с любовию  
вопием тебе таковая:

Радуйся, от младенчества Богом избранный;  
радуйся, от купели Крещения благодатию Духа  
Святаго исполненный.

Радуйся, от отрочества молитвою к Богу  
горевый; радуйся, велие попечение о спасении  
души своея издетска имевый.

Радуйся, духовную усладу в сем обретавый;  
радуйся, семя Христова учения в сердце своем  
возрастивый.

Радуйся, мудрость мира сего ни во что же  
вменивый; радуйся, всякия мирския суеты  
избегавый.

Радуйся, на небеси и на земли прославленный;  
радуйся, воплощемуся Богу Слову верно  
послуживый.

Радуйся, в проповедании Евангелия Правды  
ревность велию явивый; радуйся, Пресладкаго  
Господа Иисуса всем сердцем твоим  
возлюбивый.

Радуйся, таинниче Божий, еще на земли  
Небесных благ вкусивый.

Радуйся, преподобне отче Моисее, земли  
Уфимския похвало и молитвенниче о нас  
предивный.

## **Кондак 2**

Видя Господь душу твою, гладом духовным  
томиму, вложи в сердце твое стремление искати  
храм Божий. Ты же, смотрением Божиим, изшел  
еси из дома родительскаго во град Уфу, идеже  
обрел единственный храм Преподобнаго Сергия  
и благодарственно воспел еси хвалу Богу:  
Аллилуиа.

## Икос 2

Разум Богопросвещен имея, возжелел еси  
Единому Христу работати, в храм, обретенный  
тобою, неленостно притекал еси, молитвы  
прилежнныя со умилением тамо вознося и  
духовнаго руководства взыскуя. Сего ради из  
глубины сердца вопием ти:

Радуйся, дом отеческий смирением Божиим  
оставивый; радуйся, во град Уфу Промыслом  
Его притекий.

Радуйся, единственный храм Преподобнаго  
Сергия тамо обретый; радуйся, обретением сего  
сокровища духовно возвеселивыйся.

Радуйся, благодарение Господу за сие обретение  
от всего сердца вознесый;

Радуйся, молитися в храме сем всякую  
возможность искавый.

Радуйся, духовным хлебом тамо насыщаемый;  
радуйся, друга по душе своей на весь живот  
свой тамо обретый.

Радуйся, иго Христова, благое и легкое, на Рамо  
твое восприемый; радуйся, примером твоим  
святым вся ны к последованию Христову  
привлекаяй.

Радуйся, ревности тезоименитый ревнителю о  
славе Божией; радуйся, немолчный  
благовестниче евангельскаго душеспасительнаго  
учения.

Радуйся, благий рабе и верный, за безмерные подвиги твои вшедый в радость Господа своего. Радуйся, преподобне отче Моисее, земли Уфимския похвало и молитвенниче о нас предивный.

### **Кондак 3**

Силою Вышняго, дарованною тебе, преподобне, долготерпением твоим был еси преукрашен, егда во граде Уфе, не имея, где главу приклонити, непрестанно в трудах пребывати понужден был еси, за вся благодаря Господа и с любовью поя Ему: Аллилуиа.

### **Икос 3**

Видя опасность лишитися граду Уфе единственного храма, от богоборческих властей, велиею данию утесняема, ты, преподобне, купно с настоятелем сугубыя труды понесл еси, образ подавая верным подражати в сем тебе. Мы же, в храме сем ныне молящися, от тебе утешение получающе, воспеваем ти сицевая:

Радуйся, о сохранении храма непрестанное попечение имевый;

Радуйся, средства на содержание его всячески искавый.

Радуйся, сего ради купно с настоятелем печи в домах верных устроявый; радуйся, своими трудами и людям пользу подававый.

Радуйся, сими средствами от закрытия храм спасаый; радуйся, для чад церковных тако духовное сие сокровище сохранить помогаый.

Радуйся, яко и сам, пламенея в молитве, в храме сем пребываый; радуйся, пророка Божия Илии, в пещере жившаго, благий подражателю.

Радуйся, Крестителя Христова Иоанна, в пустыне обитавшаго, ревностный последователю; радуйся, подвижническое служение людям Божиим возлюбивый.

Радуйся, многая благодатная дарования стяжавый; радуйся, Закон Бога твоего на скрижалех сердца твоего написавый.

Радуйся, светильниче, о немже не восхоте Бог да под спудом пребывает, но на свещнице всенароднаго зрения и поклонения поставится.

Радуйся, преподобне отче Моисее, земли Уфимския похвало и молитвенниче о нас предивный.

#### **Кондак 4**

Благодатию Своею укрепи тя Господь, егда призван был еси к несению воинской службы среди неведущих Бога и противящихся Ему. И тамо ты, не преставая поучатися в Законе

Господни, небоязненно пред всеми возносил еси свои молитвы ко Господу, из глубины души воспевая Ему: Аллилуиа.

#### **Икос 4**

Видя враг рода человеческого чистое твое житие, распали противу тебе безбожнныя военачальники, повелевши изъятии у тебе Святое Евангелие. Ты же глад на себе наложи и преста повиноватися им, дондеже не возвратят Святыню сию, побуди сим вернуть тебе драгое сокровище. За таковое дерзновение ублажающе тя, глаголем сице:

Радуйся, добрый воине Христов; радуйся, силою веры во Христа преисполненный.

Радуйся, на всяцем месте Словом Божиим насыщаться желавый; радуйся, и воин быв, разлучатися с Ним не восхотевый.

Радуйся, возвратити отъятое у тебе Евангелие неповиновением безбожным начальником дерзнувый; радуйся, в сем с помощью Божиею преуспевый.

Радуйся, сим злоухищрения искусителя победивый; радуйся, молитвами твоими и от нас тьму напастей отгоняй.

Радуйся, мир и вся красная его презревый; радуйся, о Горних благах выну помышлявый.

Радуйся, столпе и светило, указуяй путь правый хотящим обрести его.

Радуйся, преподобне отче Моисее, земли Уфимския похвало и молитвенниче о нас предивный.

### **Кондак 5**

Буии века сего, видя непоколебимую веру твою и любовь ко Господу, от воинския службы тя отстраниша и безумным тя, блаженне, наименоваша. Ты же вся сия в терпении неся, за обидящих тя молитвы возносил еси, научая и нас за вся благодарити Господа, воспевая Ему хвалебную песнь: Аллилуиа.

### **Икос 5**

Проповестся в мире доблесть подвига твоего, преподобне. Вся терпел еси: глад, лишения, поругания. Нищету и юродство, и ярем нас ради Обнищавшаго на рамена своя взял, Тому последовал еси. Поминай нас, отче Моисее, любовьию чтущих тя, из глубины души зовущих ти:

Радуйся, в подвизах земное житие совершивый; радуйся, одеянием странным и рубищем паче одежды драгия украситися вожделевый.

Радуйся, деревянный крест, на паперти храма странником ти данный, купно с иконою на

персех своих носивый; радуйся, сего ради укорения и поношения, яко хвалу, приимавый.

Радуйся, биения и иныя досаждения смиренно терпевый; радуйся, крест свой усердно Христа ради понесый.

Радуйся, приимавый паче одра мягкаго на земли повержение; радуйся, во храме точию в притворе молитвы своя приносити дерзавый.

Радуйся, яко свет добрых дел твоих немерцаемо светится присно; радуйся, смирения святаго преисполненный и слезами молитвенными себе орошавый.

Радуйся, преподобне отче Моисее, земли Уфимския похвало и молитвенниче о нас предивный.

### **Кондак 6**

Видя смирение и кротость твою, Господь сподоби тя перваго послушания во храме, егоже исполняя, с трепетом велиим входил еси во святой Алтарь, благодарственно поя Богу Ангельскую песнь: Аллилуиа.

### **Икос 6**

Узрев смирение и послушание твое и ревностное усердие ко храму Господню, Архипастырь Уфимский Иоанн в праздник Преображения Господня удостои тя ангельскаго образа и

диаконства и вскоре ко служению священства призва. Ты же, радости о сем исполнився и восприятою в хиротонии благодатию облечеса, всего себе на служение Господу и пастве предал еси. Тем же и слышиши от нас похвалы сия:

Радуйся, за смирение свое ангельскаго образа восприятия сподобльшийся; радуйся, во плоти ангельски пожив.

Радуйся, и ко иерейскому служению своим Архипастырем призванный; радуйся, сугубую благодать от Господа восприявый.

Радуйся, благодатными дарами изобильно преисполненный; радуйся, всесветлым храмом благодати Божия себе показавый.

Радуйся, Алтаря Господня благоговейным служителем себе явивый; радуйся, яко Безкровныя Жертвы достойным совершителем бывый.

Радуйся, орле небопарный, крилами Богомыслия возлетевый зрети немерцающую светлость Солнца Правды, Иисуса Христа; радуйся, постников воздержание и уме чистейший, не осквернившийся прелестями мирскими.

Радуйся, на еже верою взирал еси, ныне лицом к лицу Неприступнаго Божества славу созерцаеши.

Радуйся, преподобне отче Моисее, земли Уфимския похвало и молитвенниче о нас предивный.

### **Кондак 7**

Божественным Светом просветитися хотя, постническое житие в воздержании всяцем проводил еси, правило святых отец добре соблюдая и Преподобному Серафиму подражая, стяжал еси дух мирен, отче Моисее, да сим подвигнеши ко спасению чад своих и научиши воспевати хвалебную песнь Богови: Аллилуиа.

### **Икос 7**

Весь благодатных дарований исполненный, преподобне Моисее, подвиги твоими град Уфу осиял еси. Мы же, имущее тя теплаго молитвенника и предстателя пред Господем о нас, недостойных, со умилением зовем ти:

Радуйся, всякое услаждение отложивый и постом себе питаवый; радуйся, вместо сладкого пития слезами покаяния себе напоявый.

Радуйся, подвигами поста и молитвы плоть свою духови покоривый; радуйся, вся мысленная враги оружием креста победивый.

Радуйся, яко тело твое сим умертвил еси; радуйся, яко душу твою бденными молитвами оживил еси.

Радуйся, в житии твоём древним подвижником подражавый; радуйся, образом подвигов твоих и нам путь спасения указавый.

Радуйся, усердный исполнителю Божиих велений и терпением твоим удививый Ангелов и человеков; радуйся, притекающим под кров твой сладкое упокоение.

Радуйся, во всяких нуждах призывающим тебя скорый помощник; радуйся, хотящим твоему непорочному житию последовати укрепителю.

Радуйся, путевождю во тме неверия блудящим; радуйся, надеющимся на тебя защитителю непостыдное.

Радуйся, преподобне отче Моисее, земли Уфимския похвало и молитвеннике о нас предивный.

### **Кондак 8**

Проповедник был еси Евангельския любве житием твоим, отче преподобне, егда воздвизаху на тебя гонения. Вся сия любовию побеждал еси, добром за зло воздавая и непрестанно поя Богу: Аллилуиа.

### **Икос 8**

Воссиял еси, блаженне, добротой души твоя к людем, всего себе на служение пастве своей отдавая. Благодетельнии же людие, видяще в

тебе добраго пастыря и учителя, с радостию притекаху к тебе и велие утешение и ослабу в скорбех своих по молитве твоей приимаху. Мы же, прославляя Господа, давшаго ти такуюю благодать, приносим тебе сицевая:

Радуйся, огнем любви к Богу и ближним в сердце своем горевый; радуйся, благоговейным служением своим верных ко храму Божию привлекавый.

Радуйся, всех притекавших к тебе мудрыми словесы ко истине наставлявый; радуйся, в час недоумения мысль благу на сердце полагавый.

Радуйся, помощником был еси в немощех лежащим; радуйся, во всяко время посещал еси скорбных и болящих.

Радуйся, мудрый к Богу руководителю; радуйся, заповедей Господних верный исполнителю.

Радуйся, и на земли Богом собраннаго твоего стада бодрый хранителю; радуйся, яко укрепляеши последующих ти к мужественному со врагом борению.

Радуйся, яко ходатайствуеши им венцы, достойныя трудов и подвигов их, от Христа Бога; радуйся, яко и сам правы стези Господни соделал еси и всех притекающих к тебе теми же стезями шествовати научаеши.

Радуйся, преподобне отче Моисее, земли Уфимския похвало и молитвенниче о нас предивный.

### **Кондак 9**

Трудов твоих ради многих, воздаяние от Господа приим, преподобне: благодатных дарований прозорливости и источник чудес явился еси, недуги душевныя и телесныя отгоняти. Не лиши и нас твоя молитвенныя помощи, любовью тя почитающих и воспевающих Дивному во святых Господу: Аллилуиа.

### **Икос 9**

Ветий человеческих похвалы не довлеют постигнути святое житие твое, преподобне отче Моисее. Кто бо может достойно восхвалити тя за труды и подвиги твоя: всех бо притекавших к тебе от недугов душевных и телесных врачевал еси, греховныя язвы исцеляя, скорбящих утешая, всем потребная ко спасению подавая. Сего ради благодарни сущи благодеющему тобою Богу, вопием ти сице:

Радуйся, непостижимыя судьбы Божия предвидевый; радуйся, благую волю Божию верным открывавый.

Радуйся, непременно исполняти ю побуждавый; радуйся, нарушителей Воли Божией и советов духовных премудре вразумлявый.

Радуйся, избранный собратиями, послушание духовничества смиренно понесый; радуйся, велие попечение о духовных чадах имевый.

Радуйся, благодатным учителем для братии бывый; радуйся, нелегкий крест им нести молитвами своими помогавый.

Радуйся, яко от Самого Господа ловитве духовней научился еси; радуйся, яко чрез житие твое святое Православие в душах наших утверждается.

Радуйся, града Уфы и всего Урала многоценное чудес сокровище и украшение; радуйся, иноков богомудрый руководителю.

Радуйся, преподобне отче Моисее, земли Уфимския похвало и молитвенниче о нас предивный.

### **Кондак 10**

Спасительный подвиг земнаго жития твоего завершая, сподобился еси, блаженне, прозрети кончину свою, потщался наставляти чад своих последним напутствием в жизни сей во всяком благочестии и правде проходить ю, воспевая чистым сердцем хвалу Богу: Аллилуиа.

## Икос 10

Стены каменные крепльше бе любовь твоя к Богу, до последних бо дней жития твоего совершал еси службы Божия, невзирая на немощь своего телесе. Токмо в день преставления твоего не возмог еси приити в храм, Архипастыря Анатолия о сем извещая. Приими, угодниче Христов, от наших любящих тя сердце пения сицевая:

Радуйся, яко Имя Божие тобою до последняго издыхания призывашеся; радуйся, яко праведною кончиною скончался еси.

Радуйся, до конца в послушании Церкви поживый; радуйся, яко ты верным людем всю жизнь послуживый.

Радуйся, за служение сие от Господа венец получивый; радуйся, блаженство вечное со святыми унаследовавый.

Радуйся, со Ангелы Престола Божию предстояй; радуйся, о нас грешных непрестанно молитву пред Ним возносяй.

Радуйся, преподобне отче, взиравый на Крест Святый и за люди моливыйся, всегда тако глагола еси: «Кресте Всечестный и Животворящий, его же глава до небес достиже, подножие же врата ада сокруши», даруй нам спасение; радуйся, преподобне отче, взирая на Крест Святый и тако за нас моливыйся:

Радуйся, Кресте достопокланяемый, восприемый Владыку моего и разбойника спасый, даровавший тому плоды исповедания, и нас радости исполни обетованием спасения нашего.

Радуйся, преподобне отче и друже Христов, с радостию многая страдания на земли сей за Него претерпевый и нас научивый не бояться смерти, исповедающе Господа Иисуса; радуйся, преподобне отче, всякое испытание во спасение души понести готовый и токмо благоизволения Бога Промыслителя взыскавый.

Радуйся, преподобне отче Моисее, земли Уфимския похвало и молитвенниче о нас предивный.

### **Кондак 11**

Многое множество чад духовных твоих притекоша во храм ко гробу твоему в день твоего погребения, воздавая последнее целование, лобызаху мощи твоя, преподобне, и в глубокой скорби в последний путь провожаху, воспевая песнь Богови: Аллилуиа.

### **Икос 11**

Аще плотию и погребен был, блаженнее Моисее, но духом не оставил еси скорбных чад твоих. Сие ведяще, мнози чада твоя ко гробу твоему, яко к живу ти притекаху, и всяка прошения

своя ти приношаху. И не посрамлена бысть вера их, ибо никтоже от гроба твоего тощ и неутешен отхождаше и по молитвам твоим вся на пользу просимая от Господа приимаху. Мы же, благодарни суще прославльшему тя Господу, тебе, угоднику Его, восписуем сие:

Радуйся, яко и по смерти чад своих не оставил еси; радуйся, яко с верою ко гробу твоему приходящих молитвам внемлющий.

Радуйся, яко по молитвам их чудеса и исцеления им даруеши; радуйся, яко от страстей благодатию, данною ти от Бога, души наша свобождаеши.

Радуйся, яко слезы и воздыхания скорбящих с любовью утоляеши; радуйся, яко прошения труждающихся и обремененных скоро исполняеши.

Радуйся, яко духов злобы всякия наветы побеждати помогаеши; радуйся, яко на стезю спасения всех наставляеши.

Радуйся, неведующих Бога и окамененных сердцем к покаянию пробуждаяй; радуйся, яко твоими молитвами кающися плена греховнаго свобождаются.

Радуйся, яко по молитвам твоим Врата Небесная верным отверзаются; радуйся, в скорбех и печалех сущим, источник радости в Бозе указавый.

Радуйся, преподобне отче Моисее, земли Уфимския похвало и молитвенниче о нас предивный.

### **Кондак 12**

Видя Сердцеведец Господь тя, преподобне отче Моисее, житие свое на земли непорочно поживша, подвиги многи понесша, веру в чистоте соблюдша, и яко мнози людие Уральскаго края за сие с теплою любовию почитают память твою, во укрепление веры их и велие утешение, прослави тя, яко угодника Своего, в лике преподобных. Мы же, радости исполняяся о сем, Дивному во святых Своих Господу, из глубины души вопием: Аллилуиа.

### **Икос 12**

Хранит Господь вся кости праведных, и ни едина от них сокрушится. И твоя святая мощи дивно яви Господь по твоём прославлении на утешение наше, яко животворный источник благодати, юже изобильно почерпающе вси притекающие в храм к раце мощей твоих, в радости возсылая хвалу Богу, вопиют ти таковая:

Радуйся, к лику преподобных причтенный; радуйся, прославлением твоим верныя люди Уфимския земли радости исполнивый.

Радуйся, отче святыи, духовныя чада своя у раки мощей твоих собираяи; радуйся, вся прошения их приемляи и Престолу Вседержителя приносяи.

Радуйся, яко велие утешение и благодатную помощь вси приходящи к тебе приемлют; радуйся, яко за вся сия из глубины души благодеющему чрез тя Господу благодарение приносят.

Радуйся, яко с новомученики и исповедники земли Уфимския ныне на Небеси торжествуеши; радуйся, яко со всеми святыми о нас, грешных, Господа умоляеши.

Радуйся, пред иконою Богоматери Владимирския умрети сподобившийся; радуйся, после смерти утешивший паству твою чудесным своим возвращением.

Радуйся, одиноких и оставленных отеческое заступление и болезней наших врачевателю; радуйся, похвало Ангелов, монахов же и вся Святыя Церкви.

Радуйся, преподобне отче Моисее, земли Уфимския похвало и молитвенниче о нас предивный.

### **Кондак 13**

О, пресвятыи и предивный отче наш Моисее, утешителю скорбящих, града Уфы похвало и

Церкве Христовы украшение, ныне наше приими малое сие моление, с любовью тебе приносимое, и принеси е ко Христу Богу нашему, да сохранит Он нас от всех враг видимых и невидимых, от недуга и глада, от всякия скорби и внезапныя смерти, и будущего вечнаго мучения избавит молитвами твоими и сподобит Царствия Своего всех, с тобою вопиющих Ему: Аллилуиа. Аллилуиа. Аллилуиа.

### **Молитва**

О, пастырю добрый, преподобне отче наш Моисее, ты от мятежа мира сего изшед, отвержением благ преходящих Христу последовал еси, и равноангельское житие на земли пожив, безплотных почести сподобился еси. Мы же, памятуя любовь твою ко всем, яко чада ко отцу, к тебе прибегаем и молимся со умилением: не остави, угодниче Божий, заступлением твоим нас немощных, грехми и скорбми многими обремененных, умоли Христа Бога нашего даровати нам помыслов мир, от пагубных страстей и всякия скверны воздержание, ко всем людем любовь искреннюю. Озари, преблаженне, ум наш светом лица Божия, иже ныне осиявает тя; укрепи благодатию Господнею произволение наше, да утвердившися в законе Христове,

нееленостно течем путем соблюдения заповедей святых; осени твоим благословением всех в скорбех сущих, болезнями душевными и телесными обдержимых, исцеление, утешение и избавление даруя; испроси у Господа нам дух кротости и смирения, дух терпения и покаяния, да и прочее время живота нашего проживем в вере и сокрушении сердечном и тако, по скончании сего временнаго жития, сподобимся наследовати блаженство вечное и вместе со всеми святыми и с тобою, отцем нашим, прославим от всех славимаго Бога, Безначальнаго Отца, со Единородным Его Сыном и Всесвятым и Благим и Животворящим Его Духом, ныне и присно и во веки веков. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
НЕБО**